

409

BOSNA I HERCEGOVINA
Agencija za zaštitu ličnih/osobnih podataka
u Bosni i Hercegovini
Sarajevo



БОСНА И ХЕРЦЕГОВИНА
Агенција за заштиту личних података
у Босни и Херцеговини
Сарајево

Broj: 03-1-37-2-347-2/16 BA
Datum: 13.4.2016. godine

Skupština Kantona Sarajevo
n/r Predsjedavajuća Skupštine

Predmet: Poslaničko pitanje poslanika Hameda Aljović
Odgovor, *dostavlja se* –

Veza: Vaš akt broj: 01-05-8918/16 od 4.4.2016. godine

Agencija za zaštitu ličnih podataka u Bosni i Hercegovini je zaprimila vaš akt broj i datum Veze, kojim dostavljate poslaničko pitanje poslanika Hameda Aljović, postavljeno na 13. Radnoj sjednici Skupštine Kantona Sarajevo, održanoj 30.3.2016. godine. Imenovani poslanik je, u okviru skupštinske procedure, uputio poslaničko pitanje Zavodu za izgradnju Kantona Sarajevo (u daljem tekstu: Zavod), tražeći da mu se dostave podaci (ime i prezime) svih lica koja koriste stanove koji su upisani u knjigovodstvene i finansijske knjige Zavoda, uključujući i stanove Zavoda koji su dati na čuvanje Ministarstvu za boračka pitanja Kantona Sarajevo, Upravi za inspekcijske poslove Kantona Sarajevo, Stručnoj službi Vlade Kantona Sarajevo, Ministarstvu za stambene poslove Kantona Sarajevo i Ministarstvu za ljudska prava i izbjeglice Bosne i Hercegovine. Zavod je odbio dostaviti navedene podatke, pozivajući se na provođenje procedura koje propisuje Zakon o zaštiti ličnih podataka i obaveznu saglasnost za obradu posebne kategorije ličnih podataka.

U vezi s odgovorom Zavoda, imenovani poslanik je postavio pitanje da li se na navedene podatke (ime i prezime) može primjeniti Zakon o zaštiti ličnih podataka ili je Zavod isti iskoristio kao „zaštitu“ za nedostavljanje traženih podataka.

Na postavljeno pitanje, Agencija daje sljedeći odgovor:

Zakon o zaštiti ličnih podataka („Službeni glasnik BiH“ br. 49/06, 76/11 i 89/11) (u daljem tekstu: Zakon) je donesen s ciljem da se svim licima na teritoriji Bosne i Hercegovine, bez obzira na državljanstvo ili prebivalište, osigura zaštita ljudskih prava i osnovnih sloboda, naročito pravo na privatnost i zaštitu podataka u pogledu obrade ličnih podataka koji se na njih odnose. Zakon je opšti propis koji reguliše zaštitu ličnih podataka i primjenjuje se na lične podatke koje obrađuju svi kontrolori, osim ako drugi zakon ne nalaže drugačije.

Shodno članu 3. alineja 1) Zakona, lični podaci znače bilo koju informaciju koja se odnosi na fizičko lice koje je identifikovano ili se može utvrditi identitet lica. Dakle, ime i prezime je lični podatak, jer se na osnovu istog može utvrditi identitet određenog lica, ali isti ne spadaju u posebnu kategoriju ličnih podataka u smislu člana 3. alineja 3) Zakona.

Davanje ličnih podataka koje posjeduje kontrolor, Zakon je regulisao članom 17. Prema odredbama ovog člana, kontrolor je dužan provesti postupak ocjene osnovanosti konkretnog zahtjeva i u skladu s takvom ocjenom dati tražene podatke ili odbiti zahtjev. Pravni osnov za davanje ličnih podataka može biti prvenstveno utvrđen javni interes, a potom zakonom utvrđena nadležnost ili zakonit interes treće strane, te saglasnost nosioca ličnih podataka. Ako

je svrha za koju se podaci traže suprotna principima obrade ličnih podataka propisanim u članu 4. Zakona ili ako treća strana nema pravnog osnova da dobije lične podatke koje traži u smislu člana 5. i 6. Zakona, kontrolor mora odbiti takav zahtjev.

Propisani pravni osnovi nisu postavljeni kumulativno, što znači da je dovoljno postojanje jednog od tih osnova za davanje ličnih podataka trećoj strani. Ovdje je bitno naglasiti, da saglasnost nositelja ličnih podataka nije potrebna ukoliko je ispunjen neki od uslova iz člana 6. Zakona, prvenstveno ukoliko se radi o javnom interesu.

Stanovi koji su u vlasništvu Zavoda predstavljaju državnu imovinu, pa je neupitno od javnog interesa vršenje kontrole i transparentnost korištenja tih stanova. Otkrivanje imena i prezimena lica koja koriste predmetne stanove može uticati na privatni život tih lica. I pored mogućeg uticaja na privatni život, evidentan je prevlađujući javni interes za dostavljanje informacije skupštinskom poslaniku o tome ko su korisnici stanova u vlasništvu Zavoda. Naime, teško se mogu pretpostaviti štetne posljedice koje mogu imati korisnici predmetnih stanova otkrivanjem njihovog imena i prezimena, a koje bi nadjačale javni interes u pogledu vršenja kontrole korištenja državne imovine.

Dakle, sa aspekta Zakona ne postoji smetnja da Zavod dostavi spisak korisnika stanova u svom vlasništvu poslaniku Skupštine Kantona Sarajevo, osim ukoliko to nije ograničeno drugim zakonom.



DIREKTOR
Petar Kovačević

Dostaviti:

- Naslovu
- Spis predmeta